

Kumusta gikan sa NICARAGUA!

Ang Nicaragua usa ka nasod sa Sentral Amerika. Hapit sa 7 ka milyon ka tawo ang nagpuyo didto!



PAGPAKAYLAP SA EBANGHELYO

Ang unang mga misyonaryo miadto sa Nicaragua niadtong 1953. Karon aduna nay sobra sa 100,000 ka miyembro sa Simbahan didto! Aduna pa gani usa ka templo nga kasamtangan nga gitukod.



MGA IHO SA LINAW SA NICARAGUA

Ang mga bull shark makapuyo sa tubig sa dagat ug sa tab-ang nga tubig. Kini nagpasabot nga sila makapuyo sa mga lawod, mga suba, ug mga linaw! Sila molangoy gikan sa Dagat sa Atlantika subay sa usa ka taas nga suba aron makapuyo sa Linaw sa Nicaragua.


¿Nahki sma?

Nagpasabot kana og "kumusta ka?" sa Miskito!



PALO DE MAYO

Ang mga tawo sa Nicaragua magpahigayon og dako nga kasaulogan nga gitawag og Palo de Mayo kon moabot na ang panahon sa ting-ulan. Ilang adornohan ang usa ka kahoy o tukon og mabulokon nga mga ribbon aron mapalibot-libotan sa pagsayaw ug maglingaw-lingaw sa tibuok bulan.



PINULONGAN

Ang opisyal nga pinulongan mao ang Kinatsila. Ang uban nga tawo mosulti usab og lumad nga mga pinulongan sama sa Miskito, Sumo, ug Rama.

MGA PAGHULAGWAY PINAAGI NI DAVE KILIG



Chuwis

Ang Chuwis usa ka dula nga ginadula sa mga bata sa Nicaragua. Sa pagdula niini nga dula, magkinahanglan ka og green beans (o mga tukog) ug lungag diha sa yuta (o usa ka tasa). Hatagi og lima ka green beans ang matag magdudula. Ang una nga magdudula mag-itsa og green beans ngadto sa lungag sa tinagsa tagsa. Kon masipyat siya og kausa, moun-dang siya, ug ang sunod nga magdudula mopuli. Ang unang magdudula nga makapasulod sa tanang lima ka green beans ngadto sa lungag ang makadaog!



RISIPI

Gallopinto

Sa Nicaragua, daghang tawo ang mokaon niining kan-on ug beans nga potahe kada adlaw. Aniyay usa ka bersiyon nga mahimo nimong sulayan!

1. Pag-init og **2 ka kutsara nga mantika** ug **½ nga tinadtad nga dalag nga sibuyas**. Sugkaya sulod sa 5 ka minuto.
2. Isagol ang **1 1/2 ka tasa nga bugas humay** sulod sa 2 hangtod 3 ka minuto.
3. Dugangi og **asin** ug **3 ka tasa nga tubig**. Kuhaa ang mga liso gikan sa **katunga sa berde nga siling atsal** ug itung-tong kini sa ibabaw.
4. Taboni ug lutoa sulod sa 15 ka minuto hangtod nga hapit na mohabas ang tubig.
5. Ilabay ang naluto nga siling atsal ug isagol ang **2 ka tasa nga naluto na nga pula o itom nga beans** ug **1/2 sa kutsarita nga garlic powder**. Lutoa sulod sa 10 ka minuto.

Seguroha nga makapangayo og tabang sa usa ka hamtong!